

CUSSEGL GROND

Sessiun da favrer 2023

Incumbensa da la fracziun da la PS concernent la promoziun d'abitaziuns (emprima sutsegnadra Müller)

En blers lieus en il Grischun mancan emprimas abitaziuns pajablas. Pervia da quai daveantan ils problems sco l'emigraziun, la mancanza da forzas da lavur e l'augment dals custs da viver per la populaziun indigena pli e pli acuts. En emprima lingia è bain las vischnancas responsablas per la politica davart il spazi d'abitar. En vista a l'impurtanza dal problem sto dentant il chantun prender mesiras e sustegnair las vischnancas en questa incumbensa. Differentas vischnancas ed organisaziuns da la societad civila han gia formulà questa pretensiun. Dal rest oblighescha la Constituziun federala ils chantuns e la Confederaziun da s'engaschar, per che las persunas che tschertgan in'abitaziun chattian per ellas e per lur famiglias in'abitaziun adattada per cundiziuns acceptablas (art. 41 al. 1 lit. e Cst.).

Cun la Lescha davart la construcziun d'abitaziuns socialas e la meglieraziun da las relaziuns d'abitar en il territori da muntogna enconuscha il chantun Grischun actualmain mo l'agid al subject. Quest agid è concepì per sustegnair persunas singulas che vivan en relaziuns finanzialas difficilas. Oz è dentant la vasta populaziun dal chantun Grischun pertutgada dal problem. Divers auters chantuns enconuschan basas legalas correspundentas per promover il spazi d'abitar favuraivel, per exempel cun sustegnair la construcziun d'abitaziuns d'utilitad publica.

Instruments pussaivels per promover il spazi d'abitar favuraivel fissan in fond chantunal per il spazi d'abitar, emprests e contribuziuns à fonds perdu, in post spezialisà chantunal, l'elavuraziun da contracts da dretg da construcziun che pussibiliteschan da construir abitaziuns d'utilitad publica e/u in dretg da precumpra a favur da spazi d'abitar favuraivel per las vischnancas pertutgadas. Er mesiras da la planisaziun dal territori duain vegnir examinadas, sco p.ex. cumparts obligatoricas da tschertas zonas per spazi d'abitar favuraivel. Questa enumeraziun n'è ni definitiva ni stringenta, ella serva mo per preschentar soluziuns pussaivlas.

Las sutsegnadras ed ils sutsegnaders incumbenseschan la Regenza da stgaffir ina basa legala per promover emprimas abitaziuns pajablas.

Cuira, ils 15 da favrer 2023

Müller, Perl, Preisig, Atanes, Bachmann, Bardill, Baselgia, Biert, Bischof, Bisculm Jörg, Bleuler-Jenny, Cahenzli-Philipp (Vaz Sut), Degiacomi, Dietrich, Gartmann-Albin, Gredig, Hoch, Hofmann, Kreiliger, Mazzetta, Nicolay, Pajic, Rettich, Rusch Nigg, Rutishauser, Walser, Zaugg-Ettlin